



## **“Kamalak” yulduzlari” Respublika bolalar ijodiyoti festivali NIZOMI**

### **I. Umumiy qoidalar**

1.1. Mazkur Nizom iqtidorli bolalar o'rtasida “Kamalak yulduzlari” Respublika bolalar ijodiyoti festivalini (keyingi o'rinlarda – festival deb yuritiladi) o'tkazish tartibini belgilaydi.

1.2. Ushbu festival bolalar o'rtasida madaniyat, adabiyot va san'atning turlarini keng namoyon etishga xizmat qiladi.

1.3. O'zbekiston yoshlar ittifoqi, Maktabgacha ta'lim vazirligi, Xalq ta'limi vazirligi, Yoshlar ishlari agentligi, Madaniyat vazirligi, O'zbekiston Badiiy akademiyasi, O'zbekiston kompozitorlari va bastakorlari uyushmasi, O'zbekiston Yozuvchilar uyushmasi festival tashkilotchilari hisoblanadi.

1.4. O'zbekiston Respublikasida istiqomat qilayotgan millati, dini, ijtimoiy kelib chiqishi va tilidan qat'iy nazar **6 yoshdan 15 yoshgacha (nomzod 15 yoshga to'lmagan bo'lishi kerak)** bo'lgan ijodkor bolalar yakka yoki jamoaviy tarzda festivalda ishtirok etadilar.

1.5. Tashkiliy qo'mita festival nizomiga o'zgartirish va qo'shimchalar kiritish vakolatiga ega.

1.6. O'zbekiston Badiiy akademiyasi tizimidagi ixtisoslashtirilgan san'at maktablari hamda maktab-internatlar, R.M.Glier nomidagi Respublika ixtisoslashtirilgan musiqa maktabi, V.A.Uspenskiy nomidagi Respublika ixtisoslashtirilgan musiqa maktabi, P.Benkov nomidagi Respublika ixtisoslashtirilgan rassomlik maktabi, Xoreografiya ixtisoslashtirilgan maktab internati, Toshkent shahrida joylashgan Respublika tasviriy va amaliy san'at litseylari, A.Navoiy nomidagi respublika nafis san'at litseylari, ixtisoslashtirilgan musiqa va san'at maktabi o'quvchilarining hujjatlari festivalda ishtirok etish uchun qabul qilinmaydi (Qoraqalpog'iston Respublikasi hamda viloyatlarda faoliyat yuritayotgan ixtisoslashtirilgan, musiqa va san'at maktab, tasviriy va amaliy san'at litseylari o'quvchilari festivalda ishtirok etishlari mumkin).

1.7. Mazkur nizomning 1.6 bandida nazarda tutilgan o'quvchilar ishtirok etgan taqdirda tashkiliy qo'mita qarori bilan chetlashtiriladi.

1.8. Mazkur festival har yili an'anaviy tarzda o'tkaziladi.

### **II. Festivalning maqsadi**

2.1. Festivalning maqsadi – Prezident tomonidan ilgari surilgan beshta muhim tashabbusning ijrosi, iqtidorli bolalarni aniqlash, ularning iste'dodlarini namoyon qilishlariga imkoniyat yaratish va qo'llab-quvvatlash, yosh avlodning madaniy saviyasini yuksaltirish, ularning ma'naviy olamini boyitish, san'at va go'zallikka intilishini kuchaytirish, milliy san'at an'analari va yo'nalishlarini saqlab qolish, rivojlantirish va davom ettirish maqsadida har yili an'anaviy tarzda o'tkaziladi.



2.2. Iqtidorli bolalarning ijodi hamda tashabbuslarini keng ommaga namoyish qilish, ayniqsa, bolalar orasida targ'ib etish, yosh havaskor va professional ijodkorlarning faoliyatini rag'batlantirishdan iborat.

### III. Festival ishtirokchilarining huquq va majburiyatlari

3.1. Festival ishtirokchilari quyidagi huquqlarga ega.

- 6 yoshdan 15 yoshgacha mazkur Nizomning 1.4. bandida ko'rsatilgan bolalar festivalda ishtirok etadi;

3.2. Festival ishtirokchilarining asosiy majburiyatlari quyidagilardan iborat.

- ishtirokchining qonuniy vakili ota-onasi (ularning o'rnini bosuvchi shaxslar)ning festival Nizomi, shartlari bilan to'la tanishgan va uni qabul qilgan holda bolaga festivalda ishtirok etishiga ruxsat berilishi so'ralgan arizasi;

- mazkur Nizomga zid harakatlarni amalga oshirmaslik;

- festival o'tkaziladigan kunlarda belgilangan muddatlardan kech qolmaslik.

### IV. Festivalni o'tkazish bosqichlari, muddatlari va yo'nalishlari.

4.1. Festival uch bosqichda o'tkaziladi.

Festivalning **1-bosqichi** tuman va shaharlardagi musiqa va san'at maktablarida (musiqa va san'at maktabi bo'lmagan tuman (shahar)lar uchun eng yaqin joylashgan tuman (shahar) musiqa va san'at maktabida) har yili **15-30 noyabr** kunlari o'tkaziladi.

4.2. Festivalning **2-bosqichi** (hududiy bosqichi) musiqa va san'at, ixtisoslashtirilgan san'at maktablari va tegishliligi bo'yicha oliy ta'lim muassasalarida har yili **1-15 dekabr** kunlari o'tkaziladi.

4.3. Festivalning **3-respublika** bosqichi **20-25 dekabr kunlari** o'tkaziladi. Festivalning o'tkazish muddati Respublika tashkiliy qo'mitasi tomonidan kamida 20 kun oldin e'lon qilinadi.

4.4. Festival quyidagi 6 ta yo'nalish va 6 ta nominatsiya bo'yicha o'tkaziladi:

**"A" yo'nalish:** fortepiano, torli cholg'ular, damli va zarbli cholg'ular;

**"B" yo'nalish:** estrada cholg'u ijrochiligi, xalq cholg'ulari, an'anaviy cholg'u ijrochiligi;

**"C" yo'nalish:** an'anaviy xonandalik, akademik xonandalik, estrada xonandaligi, folklor va xor jamoalari;

**"D" yo'nalish:** xoreografiya - Raqs - milliy, ball raqsi hamda zamonaviy raqslar:

1) yakkaxon raqs ijrochiligi;

2) jamoaviy raqs ijrochiligi (2-10 nafargacha);

**"E" yo'nalish:**

1) tasviriy san'at - grafika, rang tasvir (natyurmort), haykaltaroshlik;

2) amaliy san'at - kulolchilik, zardo'zlik, quroqchilik, gilamdo'zlik, biser to'qish, dizaynerlik, yumshoq o'yinchoqsozlik, naqqoshlik, kashtachilik, yog'och o'ymakorligi;



### **“F” yo‘nalish:**

- 1) nasr - hikoya, ertak;
- 2) nazm yo‘nalishiga - she‘r, g‘azal, doston.

## **V. Festival shartlari**

5.1. Festival ishtirokchilari 2 (ikki) yosh toifasida ishtirok etishadi;

- 1) 6-10 yosh;
- 2) 11-14 yosh.

5.2. Ishtirokchilar festivalning Respublika bosqichi bo‘lib o‘tadigan kunga qadar 15 yoshga to‘lmagan bo‘lishlari shart.

5.3. “A”, “B”, “C”, “F” yo‘nalish ishtirokchilarining ijrosi uchun 6 daqiqagacha vaqt beriladi. “E” yo‘nalishi ishtirokchilari uchun malakali mutaxassislar tomonidan tashkil etiladigan mahorat darslari orqali baholanadi.

5.4. Belgilangan vaqtdan o‘tib ketilgan holda hay‘at a‘zolari ishtirokchining ijrosini to‘xtatish vakolatiga ega.

Shuningdek, zarur hollarda, hakamlar hay‘ati “A”, “B” “C” yo‘nalishlari ishtirokchilaridan qo‘shimcha asar ijro etish, “E” va “F” yo‘nalishlari ishtirokchilarida esa berilgan mavzuda va belgilangan vaqtda o‘zining ijodiy mahoratini ko‘rsatishi mumkin.

Barcha nominatsiyalar bo‘yicha ishtirokchilarning ijodiy chiqishlari tomoshabinlar va tinglovchilar tomonidan kuzatilishi mumkin.

5.5. “A”, “B”, “C” yo‘nalishlari ishtirokchilari o‘z dasturlarini jonli ijro etishlari va nizomda ko‘rsatilgan vaqtga qat‘iy amal qilishlari shart.

5.6. Festivalning hududiy bosqichida ishtirokchilarning ijrosi (Respublika hakamlar xay‘ati xulosasiga ko‘ra) Respublika bosqichida ishtirok etish uchun munosib deb topilmasa hakamlar xay‘ati tomonidan mazkur yo‘nalishda Respublika bosqichiga yo‘llanma bermaslik, jumladan, jamoaviy guruh, xor ishtirokchilar sonini qisqartirish vakolatiga ega.

5.8. Festivalning mahalliy va hududiy bosqichi davrida ishtirokchi birinchi yosh toifasida ishtirok etib, Respublika bosqichida ikkinchi yosh toifasiga o‘tsa ham (shaxsini tasdiqlovchi xujjatga asosan) birinchi yosh toifasida ishtirokini davom ettiradi.

5.9. Taqdim qilingan dasturlar va ijodiy ishlar namunalariga festival yakunlanguniga qadar o‘zgartirish kiritish mumkin emas.

## **VI. Festivalni tashkil etish va o‘tkazish tartibi.**

6.1. Festivalning barcha bosqichlarini tashkil etish va o‘tkazish uchun tashkiliy qo‘mita va hakamlar hay‘ati shakllantiriladi.

Festivalning I-II-bosqichlari tashkiliy qo‘mitasi quyidagi tarkibda shakllantiriladi:

1. Qoraqalpog‘iston Respublikasi Vazirlar Kengashi, viloyatlar va Toshkent shahar hokimliklari;
2. O‘zbekiston yoshlar ittifoqi Qoraqalpog‘iston Respublikasi viloyatlar va Toshkent shahar Kengashlari;
3. Maktabgacha va maktab ta‘lim vazirligi hududiy boshqarmalari;



4. Madaniyat vazirligi hududiy boshqarmalari;
5. Yoshlar ishlari agentligi hududiy boshqarmalari;
6. O'zbekiston Yozuvchilar uyushmasi hududiy bo'linmalari;
7. O'zbekiston Badiiy akademiyasi Badiiy ijodkorlar uyushmasi hududiy bo'linmalari.

8. O'zbekiston kompozitorlari va bastakorlari uyushmasi hududiy bo'limlari.

Ushbu tashkilotlarning mahalliy bo'limlari bo'lmagan taqdirda, tashkilotning hududiy boshqarmalari rahbarlari mahalliy tashkiliy qo'mita a'zosi hisoblanadi.

6.2. Festivalning I-II-III bosqichlari uchun har bir yo'nalishda 3 nafardan kam bo'lmagan sohaning malakali mutaxassislaridan iborat hakamlar hay'ati shakllantiriladi. Hakamlar hay'ati tarkibi musiqa va san'at maktablarining malakali mutaxassislari, taniqli, el-hurmati va e'tiboriga, davlat mukofotlari va boshqa unvonlarga sazovor bo'lgan san'atkorlar, rassomlar, hunarmandlar, xoreograf (baletmeyster), shoir va yozuvchilar kiritilishi mumkin.

6.3. Festivalning har bir bosqichida festival tashkilotchilari yoshlar ittifoqining Markaziy Kengashi va hududiy Kengashlari hamkor tashkilotlari bilan birgalikda ishtirokchilarning chiqishlarini videokuzatuv moslamalari orqali (videokamera yoki uyali telefon) tasvirga olinishini ta'minlaydi.

6.3. Mahalliy va hududiy Hakamlar hay'ati tarkibi mahalliy va hududiy tashkiliy qo'mita tomonidan tasdiqlanadi.

6.4. Festivalning respublika bosqichida hakamlar hay'ati qarori yakuniy hisoblanib, qayta ko'rib chiqilmaydi.

## **VII. Festivalga taqdim etiladigan hujjatlar**

7.1. Festivalda ishtirok etish istagini bildirgan bolalarning hujjatlari tuman (shahar)lar miqyosida Yoshlar ishlari agentligining tuman (shahar) bo'limlari har yili **24-oktabrdan 15-noyabr kunlariga qadar** qabul qilinadi.

7.2. Festival ishtirokchilari tomonidan quyidagi hujjatlar taqdim etiladi:

- ariza-anketa;
- shaxsini tasdiqlovchi hujjat (tug'ilganligi haqida guvohnoma) ning nusxasi;
- "A", "B", "C" yo'nalishlari ishtirokchilari uchun – ijro etiladigan dasturning matni taqdim etiladi;
- "E", "F" yo'nalishlari ishtirokchilari uchun – ijodiy ish namunalari;
- ta'lim muassasasida tahsil olayotganligi to'g'risida direktori tomonidan ma'lumotnoma.

7.3. Festivalning saralash bosqichlarida hakamlar xay'ati ishtirokchi hujjatlarining asl nusxasini so'rash huquqiga ega.

7.4. Festivalning hududiy bosqich g'oliblarining Respublika bosqichida ishtirokini ta'minlovchi kafolat xati ularning qonuniy vakili tomonidan yozib berilishi talab etiladi.

## **VIII. Festival g'oliblarini taqdirlash**

8.1. Festivalning mahalliy, hududiy bosqichlarida nominatsiyalar bo'yicha eng yaxshi natijalarga erishgan ishtirokchilar, tashkilotchilar, mahalliy, hududiy hokimliklar va homiyar tomonidan tayyorlangan sertifikat, diplom va qimmatbaho sovg'alar bilan rag'batlantirilib, "Yoshlar kuni" munosabati bilan Qoraqalpog'iston Respublikasi, viloyatlar va Toshkent shahrida o'tkaziladigan gala konsertlarda o'zining badiiy chiqishlari bilan ishtirok etishi ta'minlanadi.

